

# «Moses» da Rossini reviva a Sursaiassa

La Compagnia Rossini, il Coro Opera viva ed igl Orchester Giuseppe Verdi da Budapest envidan all'opera si Sursaiassa

■ (mc) Era questa stad offerescha l'opera viva da Sursaiassa ina delicatessa musicala tut aparti. Nov gadas interpreteschan la Compagnia Rossini, il Coro Opera viva e l'Orchestra Giuseppe Verdi da Budapest en tenda da fiasta a Cuort/Sursaiassa l'opera principala «Moses» da Gioacchino Rossini. La premiera ha liug ils 27 da fenadur.

Las preparativas per l'opera Moses che vegn dada a Sursaiassa ein progredidas bein sco quei che il parsura dall'unium e dil comite d'organisaziun opera viva Thomas Mirer, il menader artistic Armin Caduff, il menader musical Gion Gieri Tuor, il menader da project Christian Durisch ed il schef da finanzas Max Watter han saviu informar ier las medias a Cuera. Tgi che vul aunc engartar in plaz ad ina dallas nov presentaziuns sto festginar, per quei rodond 80 pertschien dils plazs seigien gia reservai, han ils organisaturs tradiu. Tenor Max Watter quantan ins cun expensas totalas da 982 000 francs, da quels ein rodond 550 000 curclai cun daners da sponsoring e 350 000 quantan ins saver incassar cun entradas.

## Cuntegn ed occupaziun solistica

Il menader artistic Armin Caduff ed il menader musical Gion Gieri Tuor han informau davart cuntegn dalla opera ed occupaziun dallas rollas dils solists. El center dalla opera Moses stat la historia biblica dalla liberaziun dils Israelits dalla sclavaria e da lur fuigia ella tiara empermissa. Sco tarmess da Diu emprova Moses (Armin Caduff) da liberar siu pievel dalla sclavaria. Ensemen culla dunna Sifora (Cornelia Cathomen) e siu affon auda el ord in spinatsch barschond la vusch divina che dat ad el l'incarica e missiun da liberar siu pievel. Per quei intent survegn el in fest magic che lubescha ad el da far miraculas. Quella scena diffu-



Il success contonschiu igl onn vargau cun l'opera «I Lombardi» da Giuseppe Verdi (foto) ha animau ils responsabels da cuntinuar uonn cun l'opera «Moses» da Gioacchino Rossini.

FOTO P. DE JONG

sa vegn accumpignada d'ina musica misteriusa. Sil siu viadi da liberaziun frunta Moses sin ils schuldaus da Farao che catschan ses sclavs alla lavur. Denter quels sesanflan era ses partents: Aaron (Bruno Flepp), Elisero (Meinrad Giger), Anaide (Anika Defuns), Maria (Xenia Halon), Rebecca (Lisabet Caduff) e Safira (Gudrun Cavigelli). Sinquei planiseschan ils Hebres ina sollevaziun sut il commando da Moses che tarmetta Elisero

tier Farao (Flurin Caduff) culla supplica da dar libertad. Elisero retuorna cun Maria, la sora da Moses e sia feglia Anaide. Ord engrazievladad aulza Moses siu fest magic. En in artg annunzia in aungel la vusch divina che camonda als Hebres da conquistar il palast da Farao. El medem mument aulza Moses ad ault la tabla culs 10 condaments e tuts engiran da vuler suandar els. La fiasta d'unfrenda vegn interrutta dalla schuldata da Farao e

sia fegl Amenofi (Mihajlo Arsenki) cloma Anaide e confessa ad ella sia amur. Cu Farao e sia consorta visetan ils sclavs, nezegian ils Hebres la caschun da marcarad cun el pervia dalla liberaziun. Els cattan denton negina urbida.

## Dispettas dramaticas

Las dispettas secuntineschan e cuagl agid dil fest magic croda Egipta en ina stgira-detgna anguschusa che Farao emprova

da mitigar cun cant e sault, denton senza success. El camonda a siu fegl da maridar encunter sia veglia la feglia dil retg d'Assiria. Anaide e Amenofi vulan scappar, la fuigia vegn denton impedida entras la honoraziun dalla regina. Amiez quella cerimonia repeta Moses la pretenziun da libertad. Sil na da Farao lai Moses tremblar la tiara ed ils mirs dil tempel sederschan. L'uiara da cardientscha secuntinescha ed Amenofi ed Anaide nezegian la caschun da scappar. Els vegnan denton suati da Moses e malgrad la gronda carezia per Amenofi decida Anaide da cuntinuar il viadi cun sia famiglia. Trumpaus cloma Amenofi la schuldata da Farao ed engira da mazzar tut ils Hebres. En quella situaziun malguessa pren Moses puspei en agid siu fest magic e sparta las auas dalla mar per schar traversar siu pievel eligiu. Farao e siu fegl Amenofi persequiteschan ils Hebres silla fuigia, els van denton a frusta ellas undas che empleinan puspei il flum. Moses e siu pievel engrazian concludend a Diu per la libertad conquistada.

## Tgei ei niev uonn?

Sco quei ch'il menader da project Christian Durisch ha accentuau dattan entginas novaziuns en egl uonn. Il cudischet da program che porta la noda casa digl artist indigen Rudolf Mirer che ei era uonn puspei responsabels pil maletg da tribuna ei pli elegants, la scartira pli legibla e las informaziuns pli substanzialas. L'infrastuttura che cumpeglia ina ustria, ina lounge opera viva ei vegnida completada cun in purschida culinaria supplementara, aschia che rodund 190 persunas han ussa la pusseivladad da tschenar ellas tendas dall'opera. Il menaschi d'ustria schai els mauns da Günther Stegmaier dall'ustria Wali. Las produzioni entscheivan mingamai allas 20.30.

## PCD DALLA CADI

### Sigisbert Lutz sco referent

(cp) La Partida cristiandemocratica (pcd) dalla Cadi ha envidau ses commembers per ils treis da fenadur alla radunanza generala a Mustér. Tier las tractandas statutativas vai era per l'elecziun d'in commember da suprazonza e da fixar in di da sport igl atun proxim cun autoritads politicas e famiglias. Fridolin Cahenzli, Breil, vegn a presentar l'Unium da seniorAs dil cantun Grischun.

Suenter la radunanza plaidda Sigisbert Lutz, da Medel/Lucmagn a Berna, davart il tema zun actual e damonda brisanta «Co vesa ei ora egl avegnir cun occupar uffecis e posts politics en vischnaunca»? Il referent ei staus tochen alla fin digl onn vargau directur dalla Associazion dallas vischnauncas svizras. Tras sia liunga activitad e gronda experienza en quei post central dallas vischnauncas eis el fetg cumpetents en quella caussa.

## TRAFFIC

### Glion-Ladir

(lq) Mardis, ils 26 da zercladur denter las 07.00 e las 18.00 vegn la via da colligiazion denter Glion e Ladir, sil tschancun denter Tischinas e Ruschein, serrada muort lavurs da catramar. Per vehichels sut 16 tonnas exista in sviamet sur la via da meglieraziun.

### Breil

Da mesjamna, ils 27 da zercladur entochen venderdis, ils 29 da zercladur denter las 18.30 e las 06.00 resta la via enten il vitg da Breil serrada. Ei exista neigin sviamet.

# Sculpturas el curtgin historic

Linard Nicolay da Bravuogn expone el casti da Sagogn

■ (abc) Sonda entscheiva a Sagogn in'exposiziun da sculpturas. Quella ha buca liug en ina sala ni ina casa, mo-bein ora el liber. Igl artist Linard Nicolay expone sias ovras el curtgin historic dil casti Aspermont. Ei seigi sia emprema exposiziun persula. A Milaun, a Modena ed a Bologna eis el gia sepresentaus cun auters en exposiziuns communablas. Pigl artist grischun Linard Nicolay ei la vernissascha da sonda proxima a Sagogn pia in tierm special. El ch'ei carschius si a Bravuogn en ina famiglia da purs muossa sias ovras all'ursilvans, ed en in curtgin signuril. Il contact cun Sagogn e cul casti deriva dall'amicezia cul possessur Wolfram Kuoni. Igl advocat cun biro a Turitg ei carschius si a Domat, al gimnasi a Cuera han el e Linard Nicolay s'empriu d'enconuscher.

Il curtgin Aspermont da Sagogn ei ina oasa amiez il vitg dado. Il spazi circumdau d'in mir e duas portas en lenn c-usteivel ha Pieder Antoni Castelli a San Nazzaro schau construir igl onn 1675.

Il curtgin historic ei vegnius negligius duront biars onns e fuva en decadenza. Cu il possessur dil casti ha engaschau Jakob e Trudi Giger sco pedels dil casti ha la renaschientscha entschiet. Dapi quater onns tgira il per cun premura quella pintga oasa verda.

Oz eis ei in dign liug per in'exposiziun da sculpturas da crap. En tut expone Linard Nicolay nov lavurs abstractas. Mingina porta in num franzos. Igl ei plasticas formadas ord different material, denter auter marmel da Carrara e crap indigen dalla Surselva. La pli greva sculptura peisa rodond 450 kilos, la pli leva ch'ei

tschentada sin in sochel cun treis petgas ei rodond 30 kilos. Ch'el exponess in gi a Sagogn en Surselva havess Linard Nicolay buca sminau avon onns cu el ha empriu d'enconuscher Wolfram Kuoni. La Surselva era lunsch naven, e gliez eis ella aunc oz pil Bargunsegner. Las davosas jamnas ha el denton giu caschun d'emprender ad enconuscher glied e cuntrada. El concede che la Surselva hagi franc ina fascinaziun speciala ch'ei vali da scuvierer.

In tal ei il curtgin dil casti Aspermont a Sagogn. Quei liug idillic circumdau da casas savess fullar via al success digl artist. Aunc uss eis el detg nunenconuschents el Grischun. Suenter il seminari da scolasts eis el sescolaus vinavon sco scolast secundar. La pissiun per art e grafica ha adina accumpignau el. Ils onns 1992 e 1993 ha igl artist da 41 onns viviu en Frontscha nua ch'el ei seperfectuinaus ella sculptura. Silsuenter ha el visi-

tau l'Academia delle Arti a Carrara e Bologna. Las nov ovras ch'ei exponidas el curtgin Aspermont a Sagogn ha el creau il davos meins egl atelier da Christian Aubry a Glion.

La vernissascha el curtgin dil Casti Aspermont ha liug sonda, ils 23 da zercladur, dallas 15.00-17.00. L'exposiziun cuoza tochen ils 29 da fenadur. Duront quei temps lavura igl artist el clavau dil casti, e quei mingamai dalla gievgia entochen la dumengia, mingamai dallas 10.00-12.00 e las 15.00-19.00



Linard Nicolay ei in artist ch'ei aunc detg nunenconuschents el Grischun. L'exposiziun el curtgin dil casti Aspermont a Sagogn savess midar quei.

FOTO A. BEELI